

Carta ki'na nuu n-kidava'a Sua

Ia nani Tnu'u Ianyuux

1 Ka kakune'e-da Ia xá daa tuu nde ki'na nuu. N-ka tekuda tnu'u n-ja'an-ia. Xi'in nuu-da n-ka xini-da-ia. N-ka xo nde'a-da-ia, te xi'in nda'a-da n-ka tnii-da-ia. Ia nani Tnu'u Ianyuux kuu-ia. Kida-ia xa xtuu va'a ñayiu xi'in Ianyuux. ²N-kixi-ia nde ñuñayiu ya'a. N-ka xini-da-ia, te ka ja'an ndaa-da xaxe'e-ia. Ka ja'an-da nuu mee-n, xa antecas xa kua'a ntdaa xa io te xá daa tuu mee-ia, te ka ja'an-da nuu-n xa dani kutuu-ia kuia ma jin ndi'i. N-xo tuu-ia xi'in Taa-ia Ianyuux, te n-kixi-ia nuu xtuu mee-ro. ³Xa n-ka xini-da, ka ja'an-da nuu mee-n. Xa n-ka tekuda, ka ja'an-da nuu mee-n. Ka ja'an ña'a-da xa kunduu koio mee-n xi'in mee-da. Chi kunduu koio mee-da xi'in Ianyuux te xi'in Da'ya Yii-ia, Jesucristu. ⁴Ka kidava'a-da carta ya'a nuu mee-n, xa kuvete-ro xa kuvete ka-ro ntdaa-ro.

Luz va'a ka koko kuu Ianyuux

⁵N-ka tekuda tnu'u n-ja'an Jesucristu, te tnu'u ijan kachitnu'u-da. N-ja'an-ia xa kida Ianyuux xa jini-ro-ia. N-ja'an-ia

xa luz va'a ka koko kuu Ianyuux, te nuu tuu mee-ia, nuncas ñatu kuu nuu nee. ⁶Nux ja'an-ro xa kunduu-ro xi'in Ianyuux, ko dani kida-ro kuechi, kuu ná kuu xa xika-ro nuu nee. Nux du'a kuu, kuu xa ja'an-ro tnu'u vete, te ña kida-ro xa kuu xandaa. ⁷Nuu tuu Ianyuux, kuu nuu kanda. Nux kida-ro xava'a, tuu-ro xi'in Ianyuux, te kunduu va'a-ro, iin-ro xi'in inka-ro. Te xaxe'e xa n-xi'í Da'ya Yii-ia, Jesucristu, xaxe'e-ro, ndada ndoo ña'a Ianyuux ntdaa kuechi-ro.

⁸Nux ja'an-ro xa ñatu kida-ro kuechi, danda'u-ro mee-ro, te ñatu kutnuni ini-ro xa kuu xandaa. ⁹Nux na'ma-ro kuechi-ro, na'a-ro xa ndadandaa Ianyuux kuechi-ro. Na'a-ro xa taxkanu ini-ia kuechi-ro. Na'a-ro xa ndada ndoo ña'a-ia kuechi-ro. ¹⁰Nux ja'an-ro xa ñatu kida-ro kuechi, du'a ja'an-ro xa ja'an Ianyuux tnu'u vete, chi ja'an Ianyuux xa ntdaa-ro kuu ñayiu ka kida kuechi. Nux ja'an-ro xa ñatu kida-ro kuechi, ñatu jandixa-ro tnu'u n-taxi-ia.

Nujuiin Cristu nuu Ianyuux xaxe'e-ro

2 Da'ya kuechi-da, kidava'a-da carta ya'a nuu-n, xa maxku

kada koio ka-n kuechi. Ko iin ñayiu, nux na kada-i kuechi, te nujuiin Jesucristu nuu Taa-ia lanyuux xaxe'e-ro. Xaxe'e xa nuncas ña n-kida Jesucristu ni iin kuechi, kua'a-ia xa ja'an-ia nuu lanyuux xaxe'e mee-ro. ²Xaxe'e Jesucristu, taxkanu ini ña'a lanyuux kuechi-ro. Chi na n-xi'í Jesucristu nuu curuxi, n-chiya'u-ia kuechi mee-ro, te diuni n-chiya'u-ia kuechi ntdaa ñayiu ñuñayiu.

³Nux kida-ro xa ta'u tniú lanyuux, na'a-ro xa kunduu-ro xi'in mee-ia.

⁴Iin ñayiu, nux ja'an-i: "Joon, kunduu-r xi'in lanyuux", ko ña kida mee-i xa ta'u tniú-ia, ja'an-i tnu'u vete, te ñatu kidatniú tnu'u lanyuux anu-i. ⁵Ko iin ñayiu, nux jandixa-i tnu'u lanyuux xi'in ntdaa anu-i te du'a kida-i, xandaa kuu xa xemani ñayiu jan lanyuux. Du'a xini-ro xa kunduu-ro xi'in lanyuux. ⁶Iin ñayiu, nux ja'an-i xa kunduu-i xi'in lanyuux, io xa kada mee-i xava'a, ná n-kida Jesucristu xava'a.

Tnu'u ta'u tniú xee

⁷Ñani-da ku'a-da, ñatu kidava'a-da iin tnu'u ta'u tniú xee. Tnu'u kidava'a-da vitna, iin nuu kuu xi'in tnu'u n-ka tñii-n nde ki'na nuu. Xá n-ka tekú-n tnu'u ta'u tniú ya'a.

⁸Ko diuni, ná kuu iin tnu'u ta'u tniú xee, da kuu tnu'u kidava'a-da vitna. Na n-xo tuu Jesucristu ñuñayiu, n-kida-ia ná ja'an tnu'u ya'a, te vitna ka kida mee-n ná ja'an tnu'u ya'a. Du'a kuu, chi xaxe'e xa vax ndi'i xanee, chi xá n-kixi Jesucristu te dakutnuni mee-ia ñuñayiu.

⁹Nux ja'an iin ñayiu xa tuu-i nuu kanda, ko xini u'u-i ñani-i

ku'a-i, dani tuu-i nuu nee. ¹⁰Nux xemani iin ñayiu ñani-i ku'a-i, tuu-i nuu kanda lanyuux, te ña xe ki'i-i kuechi. ¹¹Nux ña xemani iin ñayiu ñani-i ku'a-i, tuu-i nuu nee, te xika-i nuu nee. Te ña xini-i ndexu ji'in-i, chi xaxe'e xanee ña kanda nuu-i.

¹²Da'ya kuechi-da, kidava'a-da nuu mee-n, chi xaxe'e Jesucristu, xá n-taxkanu ini lanyuux kuechi-n. ¹³Sexa'nu, kidava'a-da nuu mee-n, xaxe'e xa ka xini-n Jesucristu, la xá daa tuu antecas xa kua'a ntdaa xa io. Sekuechi, kidava'a-r nuu-n, chi ña n-ka xejoon-n xa kadatniú kui'na anu-n.

Da'ya kuechi-da, n-kidava'a-da nuu mee-n, xaxe'e xa ka xini-n Taa-ro lanyuux. ¹⁴Sexa'nu, n-kidava'a-da nuu mee-n, xaxe'e xa ka xini-n la xá daa tuu antecas xa kua'a ntdaa xa io. Sekuechi, n-kidava'a-r nuu-n, xaxe'e xa ka kundee ini-n xa jandixa na'i ka-n Jesucristu. N-ka xejoon-n xa kadatniú tnu'u lanyuux anu-n, te xijan kuu xa ñatuka taxnuni kui'na anu-n.

¹⁵Maxku juemani koio-n ñuñayiu, maxku juemani koio-n xa io ñuñayiu. Nux xemani iin ñayiu ñuñayiu, te kuu xa ñatu xemani-i Taa-i lanyuux. ¹⁶Nux xemani iin ñayiu ñuñayiu, kukajan ini-i xa ni'i-i ntdaa xa juini yiki kuñu-i, kukajan ini-i xa ni'i-i ntdaa xa nde'a-i. Najuen tnu'u-i mee-i, xaxe'e ntdaa xa neva'a-i xi'in ntdaa xa kuu-i. Xa'a kuu xa ña juini lanyuux xa kada-ro. Xa'a kuu xa kida ñayiu ña ka juini xa kunduu-i xi'in lanyuux. ¹⁷Chi vax ndi'i ñuñayiu ya'a, vax ndi'i ntdaa xa kukajan ini

ñayiu. Ko ñayiu ka kida xa juini Ianyuux, kutuu va'a-i xi'in Ianyuux kuia ma jin ndi'i.

Tnu'u ndaa xi'in tnu'u vete

¹⁸Da'ya kuechi-da, xá vax ndi'i ntdaa xa io. Xá n-ka tekun-xa kixi iin se danda'u ñayiu. Ja'an-s xa kida-s ná n-kida Cristu, ko nini du'a ja'an-s, kidatniu-s xa danaa-s ntdaa xa n-kida Cristu. Kuu-s anticristu. Te vitna du'a kuu. Xá n-ka kixee kue'e anticristu. Xijan kuu xa xini-ro xa n-xee xa vax ndi'i ntdaa xa io. ¹⁹Se ka kuu anticristu, n-ka dandoo ña'a-s mee-ro. Ko ña ndaa xa n-ka kunduu-s xi'in-ro, chi nux da n-kuu, dani ku kunduu-s xi'in-ro nde vitna n-kuu. N-ka dandoo ña'a-s, te du'a n-ka dande'a ña'a-s xa ni iin-s ña n-ka kunduu-s xi'in-ro.

²⁰Xá n-taxi Jesucristu Espíritu Ianyuux nuu mee-n, xa kutnuni ini koio-n xa kuu xandaa.

²¹Ñadu kidava'a-da xaxe'e xa ña kutnuni ini-n xa kuu xandaa, chi kidava'a-da xaxe'e xa ka kutnuni ini-n xa kuu xandaa. Te ka kutnuni ini-n xa tnu'u vete ñatu kuu tnu'u ndaa.

²²¿Te jundu kuu se ja'an tnu'u vete? Kuu-s se ja'an xa ña ndaa xa Jesús kuu Cristu, Ia n-tunda'a Ianyuux. Se du'a ja'an, anticristu kuu-s. Ñatu jandixa-s Ianyuux ni Da'ya Yii Ianyuux. ²³Iin ñayiu, nux ja'an-i xa ña jandixa-i Da'ya Yii Ianyuux, xini-ro xa diuni ña jandixa-i Ianyuux. Ko inka ñayiu, nux ja'an-i xa jandixa-i Da'ya Yii Ianyuux, xini-ro xa diuni jandixa-i Ianyuux.

²⁴Nde ki'na nuu xa n-ka tekun-tnu'u Jesucristu. Jandixa na'i koio

ka-n tnu'u jan. Nux jandixa na'i koio ka-n tnu'u n-ka tekun-ki'na nuu, du'a kunduu na'i koio-n xi'in Da'ya Yii Ianyuux, te kunduu na'i koio-n xi'in Taa-ia Ianyuux. ²⁵Xá n-taxi Jesucristu tnu'u-ia xa du'a kutuu va'a-ro xi'in Ianyuux kuia ma jin ndi'i.

²⁶Kidava'a-da nuu-n, xa kakune'e-da se ka juini xa danda'u ña'a koio-s mee-n. ²⁷Xá n-taxi Jesucristu Espíritu Ianyuux nuu-n, te kidatniu-ia anu-n. Xijan kuu xa ña ndoñu'u-n xa dakua'a ña'a ni iin ñayiu. Dakua'a ña'a Espíritu Ianyuux ntdaa xa ndoñu'u-n. Meni xandaa kuu xa dakua'a ña'a-ia, ñatu kuu tnu'u vete. Xijan kuu xa, nani dakua'a ña'a-ia dani kunduu na'i koio-n xi'in-ia.

²⁸Da'ya kuechi-da, kunduu na'i koio ka-n xi'in Jesucristu. Nux du'a kada koio-n, te du'a ma yu'u-ro nuu-ia, te ma kujanuu-ro nuu-ia hora na ndixi-ia. ²⁹Ka xini-n xa kida Jesucristu meni xava'a. Diuni jini koio-n xa ntdaa ñayiu ka kida xava'a ka kuu-i da'ya Ianyuux.

N-ka nduu-n da'ya Ianyuux

3 Jira, inaka va'a xemani ña'a Ianyuux mee-ro! N-danani ña'a-ia da'ya-ia, te ndaa xa vitna kuu-ro da'ya-ia. Xijan kuu xa, nani ña n-ka xini ñayiu ñuñayiu mee-ia, dani ñatu ka xini ña'a-i mee-ro tuku. ²Ñani mani-da, ku'a mani-da, vitna kuu-ro da'ya Ianyuux, te ta dande'a ka-ia ñayiu ñuñayiu ntdaa xa ku kuu-ro. Hora na ndixi Jesucristu, te ku kuu mee-ro ná kuu mee-ia. Hora ijan, jini va'a-ro-ia.

³Xndetu-ro xa ndixi Jesucristu, te

xejoon-ro xa taxnuni-ia anu-ro. Meni xava'a kida mee-ia, te iin iin ñayiu xndetu mee-ia, juini-i xa kada mee-i ná kida mee-ia.

⁴Iin ñayiu, nux kida na'i-i kuechi, ñayiu xee ini kuu-i. Ñatu jandixa-i tnu'u lanyuux, te xi'in tnu'u-ia tekuechi-ia-i. ⁵Va'a xna'a-n xa n-kixi Jesucristu ñuñayiu xa dita-ia kuechi ñayiu. Nuncas ña n-kida mee-ia ni iin kuechi. ⁶Iin ñayiu, nux kunduu na'i-i xi'in Jesucristu, du'a ña kida na'i-i kuechi. Iin ñayiu, nux kida na'i-i kuechi, ta jini ka-i Jesucristu, te ta kutnuni ini ka-i nax n-kida-ia xaxe'e-i. ⁷Da'ya kuechi-da, maxku juejoon koio-n xa danda'u ña'a ni iin ñayiu. Nux kida iin ñayiu xava'a, kida-i ná kida Jesucristu. Te ná kuu mee-ia, da kuu ñayiu jan.

⁸Nux dani kida iin ñayiu kuechi, kuu-i da'ya kui'na. Nde ki'na nuu n-kida kui'na kuechi, te dani kida na'i-i nde vitna. Xijan kuu xa n-kixi Da'ya Yi lanyuux ñuñayiu, xa danaa-ia ndaa xa n-kida kui'na.

⁹Iin ñayiu, nux kuu-i da'ya lanyuux, ma kada na'i-i kuechi, chi kuu-i da'ya lanyuux. Ña kua'a-i xa kada ka-i kuechi, ña juini-i xa kada-i kuechi, chi da'ya lanyuux kuu-i. ¹⁰Du'a xini-ro jundu kuu da'ya lanyuux te jundu kuu da'ya kui'na. Nux ña kida iin ñayiu xava'a, ñatu kuu-i da'ya lanyuux. Nux ña xemani-i ñani-i ku'a-i, ñatu kuu-i da'ya lanyuux.

Na juemani tna'a-ro

¹¹Xa'a kuu tnu'u xá n-ka tekun nde ki'na nuu. Xá n-ka tekun xa io xa juemani tna'a-ro. ¹²Maxku ku kuu mee-ro ná n-kuu taxa'nu

tnetnu-ro, se n-xo nani Caín. Da'ya kui'na n-kuu Caín, te n-xa'ni-s ñani-s. Te, ¿nakuenda n-xa'ni-s ñani-s? Chi xaxe'e xa n-xo kida ñani-s xava'a, te n-xo kida mee-s xa u'u.

¹³Ñani-da ku'a-da, ñayiu ñuñayiu ma juemani ña'a koio-i mee-n.

¹⁴Antecas xa jandixa-ro Jesucristu, n-kuu-ro ná kuu ndiyi. Vitna, ndaa xa ndito-ro. Xini-ro xa du'a kuu, chi xemani-ro ñani-ro ku'a-ro. Iin ñayiu, nux ñatu xemani-i ñani-i ku'a-i, dani kuu-i ndiyi. ¹⁵Iin ñayiu, nux ña xemani-i ñani-i ku'a-i, kuu-i ná kuu iin ñayiu xa'ni ndiyi. Te xna'a-n xa iin ñayiu xa'ni ndiyi, ñatu tuu va'a-i xi'in lanyuux. ¹⁶N-dande'a ña'a lanyuux xa xemani ña'a-ia mee-ro, hora n-xi'f Jesucristu xaxe'e-ro. Te io xa kuú mee-ro tuku xaxe'e ñani-ro ku'a-ro, nux ndoñu'u xa du'a koo. ¹⁷Iin ñayiu, nux tuu va'a-i ñuñayiu, te xini-i xa ndoñu'u ñani-i ku'a-i, ko ña kundau ini-i-yi te ña xia'an-i xa ndoñu'u-i, te, ¿nanda kuu xa ja'an-i xa xemani-i ñani-i ku'a-i? Nux du'a kida-i, te ña ndaa xa xemani-i lanyuux. ¹⁸Da'ya kuechi-da, na dande'a-ro ñani-ro ku'a-ro xa ndaa xa xemani-ro-i. Va'a na ja'an-ro nuu-i, ko diuni na chindee-ro-i. Du'a dande'a-ro-i xa ndaa xa xemani-ro-i.

Xaxe'e Jesucristu, ña ndoñu'u xa yu'u-ro nuu lanyuux

¹⁹Nux du'a kida-ro, xini-ro xa ndaa xa kunduu-ro xi'in Jesucristu, te ña ndoñu'u xa yu'u-ro nuu lanyuux. ²⁰Na'a lanyuux ndaa. Nux tekuechi ña'a anu-ro, ko ma yu'u-ro, chi xá n-ja'an lanyuux xa

nux xemani-ro ñani-ro ku'a-ro, du'a kunduu-ro xi'in mee-ia. ²¹Ñani mani-da, ku'a mani-da, nux ña tekuechi ña'a anu-ro, ña ndoñu'u xa yu'u-ro nuu Ianyuux. ²²Ntdaa xa xijan-ro, te taxi-ia, chi jandixa-ro tnu'u ta'u tniu-ia, te kida-ro xa tna ini-ia. ²³Te xa'a kuu xa n-ta'u tniu ña'a-ia. Io xa jandixa-ro Da'ya Yii-ia, Jesucristu, te io xa juemani tna'a-ro, iin-ro xi'in inka-ro. Du'a n-ta'u tniu ña'a-ia. ²⁴Ĥin ñayiu, nux kida-i xa ta'u tniu Ianyuux, kunduu-i xi'in Ianyuux te kunduu Ianyuux xi'in mee-i. Xá n-taxi Ianyuux Espíritu Ii, te kida Espíritu Ii xa na'a-ro xa kunduu Ianyuux xi'in-ro.

**Espíritu Ianyuux xi'in
se kuu anticristu**

4 Ñani mani-da, ku'a mani-da, maxku jandixa koio-n dava'a nga ñayiu ja'an xa kachitnu'u-i tnu'u Ianyuux. Kototnuni-n-yi, nux ndaa xa ja'an-i tnu'u Ianyuux, a nux ja'an-i tnu'u kui'na. Chi ñuñayiu, io kue'e ñayiu ka ja'an xa xian tnu'u-i tnu'u Ianyuux nuu ñayiu, ko ña ndaa. ²Ĥin ñayiu, nux jandixa-i xa Jesús kuu Cristu, Ia kuu Da'ya Yii Ianyuux, te diuni jandixa-i xa kuu-ia Se kuu ñani tna'a xi'in ñayiu, te xandaa kuu xa ka kachitnu'u-i tnu'u Ianyuux. Du'a kutnuni ini-n xa n-tunda'a Espíritu Ianyuux mee-i. ³Ĥin ñayiu, nux ñatu jandixa-i xa Jesús kuu Da'ya Yii Ianyuux te diuni kuu-ia Se kuu ñani tna'a xi'in ñayiu, kutnuni ini-n xa ñatu kachitnu'u-i tnu'u Ianyuux, kutnuni ini-n xa ja'an-i tnu'u se kuu anticristu. Xá n-ka tekun xa kixi se kuu anticristu, te vitna tuu-s ñuñayiu.

⁴Da'ya kuechi-da, mee-n ka kuu da'ya Ianyuux, te xijan kuu xa ndaku ka mee-n dada se ijan. Taxnuni Ianyuux anu mee-n, te taxnuni kui'na anu mee-s. Ko kue'e kunxa'nu ka Ianyuux dada kui'na. Xijan kuu xa unu ndaku ka mee-n dada mee-s. ⁵Se ijan, ka kuu-s se ñuñayiu. Xijan kuu xa, tnu'u ka ja'an-s kuu tnu'u ka jandixa ñayiu ñuñayiu, te ka xeka va'a ñayiu ñuñayiu tnu'u-s. ⁶Ko mee-ro, ka kuu-ro da'ya Ianyuux. Ñayiu xini Ianyuux, ka xeka va'a-i tnu'u-ro. Ñayiu ña ka kuu da'ya Ianyuux, ña chinuu-i tnu'u-ro. Nux xeka va'a iin ñayiu tnu'u-ro, te xini-ro xa taxnuni Espíritu Ianyuux anu-i. Nux ñatu chinuu iin ñayiu tnu'u-ro, te xini-ro xa taxnuni se kuu anticristu anu-i. Ĥin kuu xandaa, ko inka kuu xa ña ndaa.

Ianyuux kuu Ia xemani ntdaa ñayiu

⁷Ñani mani-da, ku'a mani-da, na juemani tna'a-ro, chi nux xemani tna'a-ro, kutnuni ini-ro xa taxnuni Ianyuux anu-ro. Nux xemani iin ñayiu ñani-ro ku'a-ro, kuu-i da'ya Ianyuux te xini-i Ianyuux. ⁸Nux ñatu xemani iin ñayiu inka ñayiu, ta jini ka-i Ianyuux, chi Ianyuux kuu Ia xemani ntdaa ñayiu. ⁹Hora n-tunda'a Ianyuux Da'ya Yii-ia ñuñayiu, n-dande'a ña'a-ia mee-ro xa xemani ña'a-ia. Idini Da'ya Yii Ianyuux io. ¹⁰Xaxe'e xa jandixa-ro mee-ia, xtuu va'a-ro xi'in Ianyuux. Xaxe'e Da'ya Yii-ia, xemani Ianyuux ñayiu. Juini ña n-ka xemani mee-ro mee-ia, ko n-xemani ña'a mee-ia mee-ro. N-tunda'a-ia Da'ya Yii-ia ñuñayiu, xa chiya'u-ia kuechi-ro, na n-xi'f-ia nuu curuxi.

¹¹Ñani mani-da, ku'a mani-da, nux du'a n-xemani ña'a lanyuux mee-ro, diuni io xa juemani tna'a mee-ro. ¹²Nuncas ña n-xini ni iin ñayiu xi'in nuu-i lanyuux. Ko nux xemani tna'a-ro, du'a xini-ro xa tuu lanyuux xi'in-ro te kida-ia xa xemani-ro mee-ia xi'in ñayiu. ¹³Du'a kutnuni ini-ro xa kunduu mee-ro xi'in mee-ia te kunduu mee-ia xi'in mee-ro, chi xá n-taxi-ia Espiritu mee-ia. ¹⁴Xi'in nuu mee-da, n-ka xini-da Da'ya Yii lanyuux. Ka ja'an ndaa-da xa n-tunda'a lanyuux Da'ya Yii-ia ñuñayiu, xa dakaku-ia ñayiu ñuñayiu, xa ma kuú koio-i xi'in kuechi-i. ¹⁵Iin ñayiu, nux jandixa-i xa Jesús kuu Da'ya Yii lanyuux, du'a kunduu lanyuux xi'in mee-i, te kunduu mee-i xi'in lanyuux.

¹⁶Du'a kutnuni ini-ro xa xemani ña'a lanyuux mee-ro. Te du'a jandixa-ro xa xemani ña'a-ia mee-ro. lanyuux kuu Ia xemani ñayiu. Nux xemani iin ñayiu lanyuux xi'in ñayiu, kunduu mee-i xi'in lanyuux, te kunduu lanyuux xi'in mee-i. ¹⁷Du'a kida lanyuux xa xemani-ro mee-ia. Te ma yu'u-ro nuu Jesucristu, na ndixi-ia xa ndadandaa-ia ntdaa xa io. Chi juini dani tuu-ro ñuñayiu, ko ná kuu mee-ia da ka kuu mee-ro suku. ¹⁸Ñatu yu'u-ro nuu lanyuux, chi kutnuni ini-ro xa xemani ña'a-ia mee-ro. Nux yu'u iin ñayiu nuu lanyuux, kuu xa ndetu-i xa kada u'u ña'a lanyuux mee-i. Nux yu'u-i nuu lanyuux, kuu xaxe'e xa ta kutnuni ini ka-i xa xemani lanyuux mee-i, te ta xee ka-i xa juemani mee-i lanyuux.

¹⁹Xemani-ro lanyuux, xaxe'e xa n-xemani ña'a lanyuux mee-ro ki'na nuu. ²⁰Iin ñayiu, nux ja'an-i xa xemani-i lanyuux, ko xini u'u-i ñani-i ku'a-i, kuu-i iin ñayiu ja'an tnu'u vete. Nux nde'a-i ñani-i ku'a-i, te ñatu xemani-i-yi, ¿janda kua'a-i xa juemani-i lanyuux, Ia ña nde'a-i? ²¹Te xa'a kuu tnu'u n-ta'u tniu lanyuux. Nux xemani iin ñayiu lanyuux, io xa juemani-i ñani-i ku'a-i suku.

Ndaku ka mee-ro dada xa io ñuñayiu

5 Iin ñayiu, nux jandixa-i xa Jesús kuu Cristu, kuu-i da'ya lanyuux te xemani-i Taa-i lanyuux. Te nux xemani-i lanyuux, diuni xemani-i da'ya lanyuux. ²Nux xemani-ro lanyuux te jandixa-ro tnu'u ta'u tniu-ia, na'a-ro xa xemani-ro da'ya-ia suku. ³Nux xemani-ro lanyuux, io xa jandixa-ro tnu'u ta'u tniu-ia. Te ñatu vee xa kada-ro xa juini mee-ia, chi taxnuni mee-ia anu-ro. ⁴Iin ñayiu, nux kuu-i da'ya lanyuux, du'a ndaku ka mee-i dada xa io ñuñayiu. Jandixa-ro xa Jesús kuu Cristu. Xaxe'e xa'a, ndaku ka mee-ro dada xa io ñuñayiu. ⁵Ñayiu jandixa xa Jesús kuu Da'ya Yii lanyuux, mee-i ndaku ka dada dava'a nga xa io ñuñayiu.

Xa ja'an ndaa xaxe'e Da'ya Yii lanyuux

⁶Na n-kixi Jesucristu ñuñayiu, n-ya'a-ia nuu ndute te n-ya'a-ia nuu niñi. Kuu ná kuu xa n-kixi-ia xi'in ndute xi'in niñi. N-ya'a-ia nuu ndute hora n-dajuendute ña'a Sua, te n-xatu niñi hora n-xi'i-ia xaxe'e-ro. Ja'an ndaa Espiritu

Ianyuux xa du'a n-kuu, chi xandaa kuu Espíritu Ianyuux. ⁷Andiu io uni xa ja'an ndaa xaxe'e Jesucristu: Taa-ro Ianyuux, xi'in la nani Tnu'u Ianyuux, xi'in Espíritu Ianyuux. Te idini Ianyuux kuu-ia, ndruni-ia. ⁸Te ñuñayiu ya'a io uni xa ja'an ndaa xaxe'e Jesucristu: Espíritu Ianyuux, xi'in ndute nuu n-ya'a Jesucristu, xi'in ñiñi Jesucristu n-xatu. Te iin nuu ka ja'an ndaa ndruni xa'a. ⁹Nux iin nuu ka ja'an ndaa uu seyii, te io xa jandixa-ro xa ka ja'an-s. Ko yo ya'u ka xa ja'an ndaa Ianyuux, chi ja'an ndaa Ianyuux xaxe'e Da'ya Yii-ia. ¹⁰Iin ñayiu, nux jandixa-i Da'ya Yii Ianyuux, te ja'an ndaa Espíritu Ianyuux anu-i xaxe'e xa'a. Te iin ñayiu, nux ñatu jandixa-i xa ja'an Ianyuux, du'a ja'an-i xa ja'an Ianyuux tnu'u vete, chi ña jandixa-i xa n-ja'an ndaa Ianyuux xaxe'e Da'ya Yii-ia. ¹¹N-ja'an ndaa Ianyuux xa n-kida Jesucristu xa kutuu va'a mee-ro xi'in mee-ia kuia ma jin ndi'i. N-ja'an ndaa-ia xa du'a koo xaxe'e xa n-xi'i Da'ya Yii-ia xaxe'e-ro. ¹²Nux jandixa iin ñayiu Da'ya Yii Ianyuux, tuu va'a-i xi'in Ianyuux, vitna xi'in nde kuia ma jin ndi'i. Ko nux ña jandixa iin ñayiu Da'ya Yii Ianyuux, ma kutuu va'a-i xi'in Ianyuux.

Inka io xa jan do'o ña'a-da

¹³Kidava'a-da carta ya'a nuu mee-n ka kuu ñayiu ka jandixa Da'ya Yii Ianyuux. Kidava'a-da nuu-n, xa kutnuni ini koio-n xa kutuu va'a koio-n xi'in Ianyuux kuia ma jin ndi'i.

¹⁴Kua'a-ro xa koo-ro confianza nuu Ianyuux. Nux kajan-ro iin xa

ndoñu'u-ro xa kada-ro xa juini mee-ia, na'a-ro xa nini ña'a-ia. ¹⁵Te nux na'a-ro xa nini ña'a-ia, dava'a nga xa xijan-ro nuu-ia, diuni na'a-ro xa xa n-taxi-ia xa n-xijan-ro.

¹⁶Nux xini iin ñayiu xa kida ñani-i ku'a-i kuechi, io xa kajan ta'u-i xaxe'e ñani-i ku'a-i. Io iin kuechi, xa nux na kada-ro kuechi jan, te io xa kuú-ro xi'in kuechi-ro. Ñatu ja'an-da xa io xa kajan ta'u-n xaxe'e ñani-n ku'a-n kida kuechi ya'a. Ko io nga kuechi, xa nux na kada-ro kuechi jan, te ma kuú-ro xi'in kuechi-ro. Nux du'a kida ñani-n ku'a-n, te io xa kajan ta'u koio-n xaxe'e-i, te kada Ianyuux xa kutuu va'a-i xi'in-ia.

¹⁷Ntdaa xa ña kuu xava'a kuu kuechi. Ko io kuechi ma kada xa kuú-ro nux kida-ro kuechi jan.

¹⁸Na'a-ro xa iin ñayiu, nux kuu-i da'ya Ianyuux, ma koo xa dani kada ka-i kuechi. Chi neva'a Da'ya Yii Ianyuux mee-i, te du'a ma kua'a kui'na xa kadajuexa ña'a-i xa kada ñayiu jan kuechi. ¹⁹Na'a-ro xa n-ka nduu-ro da'ya Ianyuux. Te na'a-ro xa xejoon ñayiu ñuñayiu xa taxnuni kui'na anu-i.

²⁰Na'a-ro xa n-kixi Da'ya Yii Ianyuux ñuñayiu. Na'a-ro xa n-kida-ia xa kutnuni ini-ro jundu kuu-ia, n-kida-ia xa jini-ro Ianyuux Ndaa. Kunduu-ro xi'in Ianyuux Ndaa, chi kunduu-ro xi'in Da'ya Yii-ia, Jesucristu. Ianyuux Ndaa kuu-ia, te kida-ia xa kutuu va'a mee-ro, xi'in mee-ia kuia ma jin ndi'i. ²¹Da'ya kuechi-da, koo koio-n cuedado. Maxku jandixa-n santu kidava'a nda'a se ñuñayiu. Kunduu na'i koio ka-n xi'in Jesucristu, Da'ya Yii Ianyuux Ndito. Du'a na koo.